

22-12-2023

Bekalan air di Pulau Pinang pulih sepenuhnya petang ini



GEORGE TOWN - **[DIKEMAS KINI]** Kira-kira 120,000 pengguna di Pulau Pinang yang terjejas sebelum ini akan menerima bekalan air semula secara berperingkat bermula jam 2 petang Jumaat.

Ketua Menteri, Chow Kon Yeow berkata, jumlah itu hanya merangkumi 70 peratus yang mana 30 peratus lagi akan menerima bekalan air pada lewat petang ini.

Menurutnya, ia susulan kerja kimpalan bawah air untuk membaiki kerosakan pada saluran paip sebesar 1,350 milimeter (mm) di Sungai Perai yang pecah telah siap.

"70 peratus pengguna akan mula menerima bekalan air pada jam 2 petang hari ini. Sementara itu, pemulihan bekalan air untuk baki 30 peratus lagi termasuk mereka yang berada di peringkat akhir (EoL) dan kawasan tanah yang lebih tinggi, akan dipulihkan secara berperingkat lewat hari ini.

"Sebanyak 14 buah lori tangki Perbadanan Bekalan Air Pulau Pinang (PBAPP), pasukan bomba sukarela dan Majlis Bandaraya Pulau Pinang telah berada di lokasi terjejas untuk menyalurkan air kepada pengguna sejak 20 Disember lalu," katanya dalam satu kenyataan pada Jumaat.

Kon Yeow yang juga Pengerusi PBAPP berkata, sejak 10.30 pagi Jumaat, 15 buah lori tangki air dari stesen tambahan iaitu dari Kelantan, Selangor, Perak, Pahang, Johor, Melaka dan Terengganu dikerahkan untuk menyalurkan bekalan air kepada pengguna yang terjejas.

"Kita sedang berusaha untuk memulihkan sepenuhnya perkhidmatan air secepat mungkin. PBAPP juga memantau dengan teliti prestasi bahagian saluran paip yang dibaiki bagi memastikan ia tidak pecah lagi.

"Kerja membaiki kerosakan pada saluran paip tersebut hanya penyelesaian sementara bagi menyalurkan semula bekalan air kepada pengguna. Masih terdapat kebocoran kecil pada tapak yang akan menjejaskan peratus air tanpa hasil (NRW) bagi Pulau Pinang.